

Kulturikkut ingerlatsineq sunngiffimmilu sammisasaqartitsineq pillugit Inatsisartut peqqussutaata nr. 10-p, 21. maj 2002-meersup allannguutissaatut siunnersuummik kingusinnerpaamik UPA 2016-imi saqqummiusseqqullugit Naalackersuisut peqquneqarnissaannik Inatsisartut aalajangiiffigisassaattut siunnersuut, taamaaliornikkut kulturimut immikkut inatsimmik aammalu timersornermut immikkut inatsimmik suliaqartoqarsinnaaqqullugu.

(Inatsisartunut ilaasortaq, Peter Olsen, Inuit Ataqatigiit)

Akissuteqaat

(Ilinniartitaanermut, Kultureqarnermut, Ilisimatusarnermut Ilageeqarnermullu Naalackersuisoq)

Siullermeerinnineq

Naalackersuisunit siunnersuummut qujavugut, siunnersuuteqartorlu isumaqatigaarput kultureqarneq pillugu kulturikkut ingerlatsineq sunngiffimmilu sammisasaqartitsineq pillugit Inatsisartut peqqussutaasa maannakkut atuuttup kingullermik 2002-mi allanngortinneqartup inatsimmik nutaamik nalunaarut tassunga atasoq ilanngullugu taarserneqarnissaa pisariaqartoq.

Siunnersuuteqartoq siunnersuummini siunnersuuteqarpoq immikkut kulturi pillugu inatsisiliortoqassasoq immikkullu timersorneq pillugu inatsisiliortoqassasoq. Immikkoortitsinissamik siunnersuut Naalackersuisut tapersersinnaavaat, kisiannili immikkut kulturi pillugu inatsisiliorusullutik taavalu timersorneq sunngiffimmilu sammisasaqartitsineq inatsimmut tassunga ilanngukkussullugit.

Eqqumiitsuliornerup kultureqarnerullu nukittorsarnissaat Naalackersuisut anguniagaraat, taamaammallu immikkut eqqumiitsuliorneq pillugu inatsisiliornissaq kiisalu timersorneq sunngiffillu ilanngullugit immikkut kulturi pillugu inatsisiliornissaq kissaatigalugu. Taamaaliornikkut eqqumiitsuliorneq kultureqarnerlu tamarmik pisortat akissussaaffiisut pitsaanerusumik erseqqarinnerusumillu inissinniarlugit.

Inatsimmi sinaakkutaasumi nutaami eqqumiitsuliornermik kulturimillu ingerlatsisut, kommunit kiisalu Naalackersuisut akornanni akisussaaffiit agguataarnerat erseqqissarneqassapput. Inatsimmi nutaami innuttaasut kulturimik ingerlatsinermi peqataasarneri qulakkeerlugit kulturip assigiinngiaartorpassuarnik ingerlatsiviusinnaanera qulakkeerneqassaaq.

Missingersuusiorderup annertussusia aaqqissuusaanermilu aaqqiissutit politikikkut nalilersorneqassapput tullerriaarneqarlutillu. Taamaammatt pisortat akisussaaffiitut nalunaarutinullu politikikkut ingerlaavartumik nalilersuineranut tullerriaarinernullu

naleqqussarneqartartussanut tunngatillugu pingaarnertut sinaakkutaasumik inatsit immikkoortunik pitsaasumik tamatigoortumillu aaqqiinerussaaq.

Naalackersuisut isumaqarput kommunit, Naalackersuisut kulturimillu ingerlatsisut kulturi pillugu politikkimik ilusilersuinissaat piviusunngortitsinissaallu kulturi pillugu inatsisissatut siunnersuummi kisimik qulakkeerneqassanngitsut, aammali nunarsuarmi qanilliartroneq isumaqatigiissutillu assersuutigalugu UNESCO-mi atsiukkagut isiginiarneqassasut. Suleqataasut suliamut attuumassuteqartut qanimut pitsaasumillu suleqatiginissaat aammalu partiinit tamanit siammasissumik akuerineqartumik inatsisiliornissap qulakkeerneqarnissaa kissaatigaagut.

Siunnersuuteqartup kissaatigaa UKA2016-imut atatillugu immikkut kulturi pillugu inatsisissaq aammalu immikkut timersorneq pillugu inatsisissaq saqqummiunneqassasut.

Sinaakkutaasumik inatsisit marluk UKA 2015-imi Naalackersuisut Inatsisartunut saqqummiunniarpaat: ataaseq eqqumiitsuliornermut ataaserlu kultureqarnermut. Oqaatigineqareersutut timersorneq sunngiffillu kulturi pillugu sinaakkutaasumik inatsimmut ilanngunneqassapput.

Taamaammat siunnersuutip akuerineqannginnissaa Naalackersuisut inassuteqaatigaat.